



續文選卷第九

行旅

初發新林

何遜

明平原湯紹祖公孟撰

伊昔負薪暇慕義游梁楚短翮忘連翮追飛散容與
優游沐道教漸漬淹寒暑大德本無酬輕生竊自許
舟歸屬海運風積如鵬舉浮水暗舟艫合岸喧徒侶
凜凜窮秋暮初寒入洲渚鏡吹響清江懸旗出長嶼
危檣迥不進沓浪高難拒回首泣親賓中天望宛許

帝城猶隱約家園無處所去矣方悠悠含意將何語
入若耶溪

王籍

餘艖何汎汎空水共悠悠陰霞生遠岫陽景逐迴流
蟬噪林逾靜鳥鳴山更幽此地動歸念長年悲倦遊

上虞鄉亭觀濤津渚學潘安仁河陽縣詩

劉孝綽

昔余筮賓始衣冠仕洛陽無貲徒有任一命忝爲郎
再踐神仙側三入崇賢旁東朝禮髦俊虛薄廁才良
遊談侍名理掇管創文章引籍陪下膳橫經叅上庠

誰謂服事淺契濶變炎涼一朝謬爲吏結綬去承光
烹鮮徒可習治民終未長化鷄仰季智馴雉推仲康
此城隣夏穴櫺蠹茂筠篁孝碑黃絹語神濤白鷺翔
遨遊佳可望釋事上川梁秋江凍雨絕返景照移塘
織羅殊未動駭水忽如湯乍出連山合時如高蓋張
漂沙黃沫聚磐石素波揚榜人不敢唱舟子詎能航
離家復臨水眷然思故鄉中來不可絕奕奕苦人腸
沂洄若無阻謝病返清漳

帆渡吉陽洲

劉孝儀

楊帆乘浪華慘鼓要風力近樹儵而遐遙山俄已逼
欲比驚龍掣將頓陽鳥翼客行悲道遠唯須前路極

渡青草湖

陰鏗

洞庭春溜滿平湖錦帆張沅水桃花色湘流杜若香
穴去茅山近江連巫峽長帶天澄迥碧映日動浮光
行舟逗遠樹度鳥息危檣滔滔不可測一葦詎能航

西山

常建

一身爲輕舟落日西山際常隨去帆影遠接長天勢

物象歸餘清林巒分夕麗亭亭碧流暗日入孤霞繼
洲渚遠陰映湖雲尚明霽林昏楚色來岸遠荆門閉
至夜轉清迥蕭蕭北風厲沙邊鴈鷺泊宿處蒹葭蔽
圓月逗前浦孤琴又搖曳冷然夜遂深白露沾人袂
東歸發犍爲至泥溪舟中作

岑參

前日解侯印汎舟歸山東平旦發犍爲逍遙信回風
七月江水大滄波漲秋空復有峨眉僧誦經在舟中
夜泊防虎豹朝行逼魚龍一道鳴迅湍兩邊走連峰
猿拂岸花落鳥啼岩樹重煙藹吳楚連泝沿湖海通

續文選 卷九
憶昨在西掖復曾入南宮日出朝聖人端笏陪羣公
不意今棄置何由豁心胸吾當海上去且學乘槎翁

暮秋山行

岑參

疲馬臥長坂夕陽下通津山風吹空林颯颯如有人
蒼旻霽涼雨石路無飛塵千念集暮節萬籟悲蕭辰
鷓鴣昨夜鳴蕙草色已陳况在遠行客自然多苦辛

經下邳圯橋懷張子房

李白

子房未虎嘯破產不爲家滄海得壯士椎秦博浪沙

報韓雖未成天地皆振動潛匿游下邳豈曰非智勇
我來圯橋上懷古欽英風唯見碧流水曾無黃石公
嘆息此人去蕭條徐泗空

望鸚鵡洲懷禰衡

李白

魏帝營八極蟻觀一禰衡黃祖斗筭人殺之受惡名
吳江賦鸚鵡落筆超羣英鏘鏘振金玉句句欲飛鳴
鷲鷲啄孤鳳千春傷我情五嶽起方寸隱然詎可平
才高竟何施寡識冒天刑至今芳洲上蘭蕙不忍生

過李揖宅

王維

閉門秋草色終日無車馬客來深巷中犬吠寒籬下
散髮時未簪道書行尚把與我同心人樂道安貧者
一罷宜城酌還歸洛陽社

宋中

高適

梁王昔全盛賓客復多才悠悠一千年陳迹唯高臺
寂寞向秋草悲風千里來

蚤過臨淮

陶翰

夜來三渚風晨過臨淮島潮中海氣白城上楚雲蚤
鱗鱗漁浦帆泚泚蘆洲草川路日浩蕩怒焉心如搗
且言任倚仗何暇念枯槁范子名屢移遠公志尚抱
古人已云去此理今難道

蚤發交崖山還太室作

崔曙

東林氣微白寒鳥急高翔吾亦自茲去北山歸草堂
杪冬正三五日月遙相望肅肅過穎上臃臃辨夕陽
川氷生積雪野火出枯桑獨往路難盡窮陰人易傷
傷此無衣客如何蒙雨霜

赴京初入汴口曉景卽事寄兵部李郎中

杜牧

清淮控隨漕北走長安道檣形櫛櫛斜浪態迤迤好
初旭紅可染明河澹如掃澤濶鳥來遲村飢人語蚤
露蔓蟲絲多風蒲燕雛老秋思高蕭蕭客愁長裊裊
因懷京洛間宦遊何草草什伍持津梁傾湧爭追討
翽便詎可尋祕幾安能考小人乏馨香上下將何禱
唯有君子心顯豁如幽抱

山中

李夢陽

山中雨乍歇一夜瑤草長風吹翠岩竹下應石瀨響
時來展書坐悠悠絕塵想

黃金臺

王廷相

興邦良有激好賢輕千金破齊如反掌圖報一何深
二城乃不下疇測平生心白璧易爲毀喟然傷古今

嶠關行

楊慎

晨行嶠關道此道一何難曾陵高不極修坂回鬱盤
季冬十二月時節正嚴寒馬蹄踐霜雪車轍帶岡巒

凌漸正堅洹河水無汎瀾通達結凍溜改徑陟嶢岼
四望少烟火鳥路俯鴻磐悲風號古木響入玄雲端
居人盡塞向行者爲槃跚野狼嘯昏侶飢鴈短晚翰
迢迢村郭遠行行未解鞍凜凜歲方晏去去程猶寬
勞歌以詠志釋此越鄉嘆

過河內作

楊慎

晨行河內道曠然清客心太行北麓近丹流東逝深
叢芳金碧岸總翠瑛瑤林蒲梢遞餘馥柿葉垂繁陰
在藻歸樂泳遷喬聞好音客行雖云苦對此一開襟

旣懷擊壤詠復動滄浪吟古風美樂土茲情驗于今
丙子十月二十八日初發鄉邑述征有作

薛蕙

旅宦忝從事卧病輟歸田俛仰似昨日荏苒踰三年
末路謝貞素積習慚寅緣整駕別鄉邑薄言重徂遷
瞻途背梁宋振策指幽燕昔往遺維繫今來就糾纏
豈伊行役嘆良此平生誓嬰世迫物累撫化懷冥筮
齊契百年內高揖千載前慮存跡匪虧意愜道仍全
斯言俟明哲因歌遂成篇

初發京口

皇甫汈

少年慕攀鱗千里輕徒步媿匪登廟姿亦謬臨軒顧
朝躋赤墀塗夕騁青門路寧知世網嬰遂爲儒冠誤
昨浮湘江還願守箕山卧不勝戰者勞心跡兩乖忤
解纜指廣陵春戀未能渡興歌矚流波庶幾照情素
補官澶州行經曲梁作

皇甫汈

弱冠陟明廬腰章宰芳甸方齒蒞阿竒晞聲治單賤
愧乏操刀長懼遺製錦譴桐絃坐屢鳴桃花歷三見
北闕忝嘉招東省叅羣彥牽世值衝飈徂年倏奔電
驅駕邁新邦褰帷經故縣悲哉丘隴非悵矣閭井變
猶煩父老迎爭識使君面德汝匪惠心式歌詎成抃

藍田道中

靳學顏

遠薄藹葱蒨危峰抗峻朗掩鬱紺烟流娟妙瑠臺上
靈境澹無言神理渺難放舉翠披林深弄珠挹泉爽
物性總怡悅人和信駘蕩將諧遺世情庶永幽期賞
撫景謝良悟沿流牽念長軒丘有絕控綺園非近響
悵矣託深衷縈茲玄谷想

西山詩戊申冬以秩祀行作

王世貞

朝上西山艱哉嵌崱溪谷多風倏暘而陰眈眈中膚
憊慄緣音十步五步不能見人牛馬却走熊羆號吟
僕夫告痛口舌屈噤修途無端北陸遵沉道有鼯鼠
結穴何深忽而過我杳不可尋苑苑好鳥栖栖中林
我獨何爲偃僂不禁皇命秩祀俾孔之欽肅肅卿相
咫尺爾臨我躬不遑簡書是忱念思惛結眄此高岑

謁陵有述

王世貞

天開鴻濛秀萬古抱日月下有諸仙宮神龍蛻其骨

靈氣由山澤草木亦精發仰觀太清表隱隱浮員闕
九幽導金燈六丁護玉篋隧途流松風霓旌晝明滅
恐是七帝遊羣真來趨謁小臣雖未賤謬從大夫
列尸祿帝所嗔微誠何由達

于役淄川途遇大雨有述

王世貞

冥冥乾維改殷殷坤軸摧女風嘘陰穴族雲布陽臺
海色二有合嘉霖四望來玄鶴引吭鳴游魚矯鬣迴
萎葉貪故柯柔苗媚其芟裳衣旣顛倒車馬亦虺隤
迂轡就衡門野父進我杯請以甫田詩寬彼東山懷

初至登州就臺小憇

王世貞

陸走費輪蹄暑征困衣領
淡旬嶠夷造乃使煩慮屏
稅微公牘簡訟拙人吏靜
海氣蠲夙苛山風薦微冷
庭葵悄然落小雨滯遠景
篇留浩蕩域酒引無何境
臥起俱所適低回發沉省
彼煩焉終却此逸寧遂永
竊祿在牽綵援階類汲綆
顏覲久京洛心揜談箕穎
千石幸未踰吾其從小邴

春暮將赴汝南廣川舟中寄懷京邑游好

徐中行

浩浩黃河流冉冉白日晚
驅車渺何之南游洛與宛
五馬道踟躕十步一顧返
言念同懷人亮節不可讓
談天碣石宮置酒華陽館
高文敷瓊瑤清歌命簫管
携手遠追隨思情一何婉
居者弗克俱行者日以遠
春暮無歸鴻何由寄情欸

蘆溝橋

吳國倫

迴車薊北門飲馬桑乾水
蜿蜿青龍橋頽波逝如駛
喧喧行路人日晏去未已
顧我志已荼徘徊在河涘
矯首望帝居宮殿錯如綺
飄風忽西至黃沙蔽天

起不見郭生臺歎息張華里一骨千黃金安用直如
矢

下黯澹灘有感

吳國倫

灑瀕莫稱險呂梁未爲艱懸水落萬石危哉黯澹灘
崖逼迥成峽浪猛能漂山已疑鱗穴邇何止羊腸灣
妖蜮射人影毒龍奔海關島飛目不瞬軸震天番翻
捷疾轉丸下浮沉反掌間客子神欲盡舟師技何閑
須臾涉安流想像驚竒觀世情總汨沒畏路真曠阮
豈不委時命忽復生憂端蠻方難久居良當拂衣還

大梁二首

張佳胤

策馬大梁城空臺擢平陸荆榛蔽層梯秋風颯高竹
徙倚深脚踏浮雲下寒木憶昔全盛時蛾眉映羅縠
軍容壯九野賦客紛華屋人事成古今轉移若輪軸
豪貴倘可常亭榭無樵牧

我本倦游者飄泊來梁園遠峰見芒碭洪流遡阜崙
遐睎不滿意悠哉傷心魂寒子秉微尚中路轉荒榛
曾聞老監者意氣薄秋旻殞首報知己死生何足論
此道久淪喪雙淚揮夷門

過烏利巖尋烏利仙修煉故跡

歐大任

仙靈有窟宅瑤木帶崑崙我行訪名山始識烏利名
萬里從罡風飄飄雲中行借問此何所乃是真人庭
餐霞結靈氣晞髮朝陽升羽化入帝鄉倏忽見雲軒
願言從之游齋潔練我形縱身天漢上謝彼塵世榮
玄洲邈何在咫尺崑崙城從此游無窮延年以長生
東平道中喜春色有述

王世懋

中原春始半桃柳解生色垂條縈輕烟含英媚初晰

復睹千林杏繽紛綺殘白麥壠何青青欣若感 聖
曆春風蕩寰宇窮谷色轉碧駐馬望四山頗令羈懷
適微生負沈寃席藁暴中直願垂吹萬恩等潤木與
石

軍戎

從駕觀講武

庾信

校戰出長揚兵欄入鬪場置陣橫雲起開管鴈翼張
門嫌磁石礙馬畏鐵菱傷龍淵出牛斗繁弱駭天狼
落星奔騏驎浮雲上騶驩急風吹戰鼓高塵擁具裝

駭猿時落木驚鴻屢斷行樹寒條更直山枯菊轉芳
豹略推全勝龍韜揖所長小臣欣寓目還知奉會昌

閱武

吳國倫

驅馬越故壘張帷蒞崇岡飄風激東滙湖水何湯湯
陳彼桓桓旅奮臂俱飛揚鉦鼓動地發鎧甲耀日光
分曹建赤牙合隊揮干將列戟森如林羽鏃凌秋霜
俯手挽烏號飛鳥不敢翔風雲變須臾天地爲倉皇
顧予逢衣徒睹此氣益強治世不去兵暇日虞大康
農山志未逮聊以使知方

郊廟

陳太廟舞辭

無名氏

丞哉聖祖撫運升離道周經緯功格玄祇方軒邁扈
比舜陵媯緝熙是詠欽明在斯雲雷邁屯圖南共舉
大定揚越震威衡楚四奧宅心九疇還敘景星出翼
非雲人呂德暢容辭慶昭羽綴於穆清廟載揚徽烈
嘉玉旣陳豐盛斯潔是將是享鴻猷無絕

樂府上

龍丘引

梁簡文帝

龍丘一回首楚路蒼無極水照弄珠影雲吐陽臺色
浦狹村煙度洲長歸鳥息游蕩逐春心空憐無羽翼
起夜來

柳惲

城南斷車騎閣道覆清埃露華光翠網月影入蘭臺
洞房且莫掩應門或復開颯颯秋桂響非君起夜來
行行且游獵篇

劉孝威

之采講射所上林娛獵場選徒驕楚客召狩誇胡王

罕車已戒道風烏復起行欻飛具矰繳材官命蹶張
高置掩月兔勁矢射天狼蹠地不遑逸排虛豈及翔
日暮勾陳轉風清鏡吹颺歸來宴平樂寧肯滯禽荒

新成安樂宮行

陰鏗

新宮實壯哉雲裏望樓臺迢遞翔鷗仰連翩賀燕來
重欄寒霧宿丹井夏蓮開砌石披新錦梁花畫蚤梅
欲知安樂盛歌管雜塵埃

關山月

徐陵

關山三五月客子憶秦川思婦高樓上當牕應未眠
星旗映疎勒雲陣上祁連戰氣今如此從軍復幾年

長安道

阮卓

長安馳道上鐘鳴宮寺開殘雲銷鳳闕宿霧歛章臺
騎轉金吾度車鳴丞相來藹藹東都晚羣公駟御回

關山月

王褒

關山夜月明秋色照孤城影虧同漢陣輪滿逐胡兵
天寒光轉白風多輦欲生寄言亭上吏遊客解鷄鳴

出塞

楊素

漢虜未和親憂國不憂身握手河梁上窮涯北海濱
據鞍獨懷古慨慷感良臣歷覽多舊迹風日慘愁人
荒塞空千里孤城絕四隣樹寒偏易古草衰恒不春
交河明月夜陰山苦霧辰鴈飛南入漢水流西咽秦
風霜久行役河朔備艱辛薄暮邊聲起空飛胡騎塵

昔昔鹽

薛道衡

垂柳覆金堤蘼蕪葉復齊水溢芙蓉沼花飛桃李谿

采桑秦氏女織錦寶家妻關山別蕩子風月守空闈
恒歛千金笑長垂雙玉啼盤龍隨鏡隱彩鳳逐幃低
飛魂同夜鵲倦寢憶晨鷄暗牖懸蛛網空梁落燕泥
前年過代北今歲往遼西一去無消息那能惜馬蹄

從軍行

明餘慶

三邊烽亂驚十萬且橫行風卷常山陣笳喧細柳營
劍花寒不落弓月曉逾明會取河西地持作朔方城

隴頭歌辭三首

隴頭流水流離山下念吾一身飄然曠野其一朝發

欣城暮宿隴頭寒不能語舌卷入喉其二隴頭流水
鳴聲幽咽遙望秦川心腸斷絕其三

西洲曲

憶梅下西洲折梅寄江北單衫杏子紅雙鬢鴉雛色
西洲在何處兩漿橋頭渡日暮伯勞飛風吹烏臼樹
樹下卽門前門中露翠鈿開門郎不至出門採紅蓮
採蓮南塘秋蓮花過人頭低頭弄蓮子蓮子清如水
置蓮懷袖中蓮心徹底紅憶郎郎不至仰首望飛鴻
鴻飛滿西洲望郎上青樓樓高望不見盡日欄杆頭
欄杆十二曲垂手明如玉卷簾天自高海水搖空綠

海水夢悠悠君愁我亦愁南風知我意吹夢到西洲
飲馬長城窟行

唐太宗

塞外悲風切交河水已結瀚海百重波陰山千里雪
迴戍危烽火層巒引高節悠悠卷旆旌飲馬出長城
塞沙連騎跡朔吹斷邊聲胡塵清玉塞羌笛韻金鉦
絕漠干戈戢車徒振原隰都尉反龍堆將軍旋馬邑
揚麾氛霧靜紀石功名立荒裔一戎衣雲臺凱歌入

織錦曲

虞世南

寒閨織素錦含怨歛雙蛾綜新交縷澁經脆斷絲多
衣香逐舉袖釧動應鳴梭還恐裁縫罷無信往交河

後出塞

杜甫

朝進東門營暮上河陽橋落日照大旗馬鳴風蕭蕭
平沙列萬幕部伍各見招中天懸明月令嚴夜寂寥
悲笳數聲動壯士慘不驕借問大將誰恐是霍嫖姚

獨漉篇

李白

獨漉水中泥水濁不見月不見月尚可水深行人沒

越鳥從南來胡鷹亦北渡我欲灣弓向天射惜其中
道失歸路落葉別樹飄零隨風客無所托悲與此同
羅幃舒卷似有人開明月直入無心可猜雄劍挂壁
時時龍鳴不斷犀象繡澁苔生國耻未雪何由成名
神鷹夢澤不顧鴟鳶爲君一擊鵬搏九天

妾薄命

李白

漢帝寵阿嬌貯之黃金屋咳唾落九天隨風生珠玉
寵極愛還歇妬深情却疎長門一步地不肯暫迴車
雨落不上天水覆難再收君情與妾意各自東西流

昔日芙蓉花今成斷根草以色事他人能得幾時好

子夜吳歌

李白

長安一片月萬戶擣衣聲秋風吹不盡總是玉關情
何日平胡虜良人罷遠征

相逢行

李白

朝騎五花馬謁帝出銀臺秀色誰家子雲中珠箔開
金鞭遙指點玉勒乍遲回夾轂相借問知從天上來
憐腸愁欲斷斜日復相催下車何輕盈飄飄似落梅

嬌羞初解佩語笑共銜杯銜杯映歌扇似雲月中見
相見不相親不如不相見相見情已深未語可知心
胡爲守空閨孤眠愁錦衾錦衾與羅幃纏綿會有時
春風正澹蕩莫雨來何遲願言三青鳥却寄長相思
光景不待人須臾髮成絲壯年不行樂老大徒傷悲
持此道密意無令曠佳期

古塞下曲

陶翰

進軍飛狐北窮寇勢將變日落塵沙昏背河更一戰
駢馬黃金勒雕弓白羽箭射殺左賢王歸奏未央殿

欲言塞下事天子不召見東出咸陽門哀哀淚如霰

古別離詩

李端

水國葉黃時洞庭霜落夜行舟問商賈宿在楓林下
此地送君還茫茫似夢間後期知幾日前路轉多艱
巫峽通湘浦迢迢隔雲雨天晴見海檣月落聞津鼓
人老自多愁水深難急流青宵歌一曲白首對汀洲
與君桂陽別令君岳陽待後事忽差池前期日空在
木落鴈嗷嗷洞庭波浪高遠山雲似蓋極浦樹如毫
朝發能幾里暮來風又起如何兩處愁皆在孤舟裏

昨夜天月明長川寒且清菊花開欲盡薺菜泊來生
下江帆勢速五兩遙相逐欲問去時人知投何處宿
空冷猿嘯時泣對湘潭竹

關山月

司空曙

蒼茫明月上夜久光如積野漠冷胡霜關樓宿邊客
隴頭秋露暗磧外寒沙白唯有故鄉人露裳此聞笛

樂府雜體

李益

藍葉鬱重重藍花石榴色少女歸少年光華自相得

愛如寒爐火棄若秋風扇山岳起面前相看不相見
春至草亦生誰能無別情殷勤展心素見新莫忘故
遙望孟門山殷勤報君子既爲隨陽鴈勿學西流水

擣衣曲

劉禹錫

爽砧應秋律繁杵含淒風一一遠相續家家音不同
戶庭凝露清伴侶明月中長裙委嬖積輕珮垂玃瓏
汗衫餘更馥鈿移麝半空報寒驚邊鴈促思聞候蟲
天狼正芒角虎落定相攻盈篋寄何處征人如轉蓬

西州詞

溫庭筠

悠悠復悠悠昨日下西州西州風色好遙見武昌樓
武昌何鬱鬱儂家定無匹小婦被流黃登樓撫瑤瑟
朱絃繁復輕素手直屢清一彈三四解掩抑侶含情
南樓登且望西江廣復平艇子搖兩槳催過石頭城
門前烏白樹慘澹天將曙鴻鴻飛復還郎隨蚤帆去

贈遠曲

陸龜蒙

茱萸匣中鏡欲照心還懶本是細腰人別來羅帶緩
從君出門後不奏雲和管妾思冷如簧時時望君暖

心期夢中見路遠魂夢斷怨坐泣西風秋牕月華滿

從軍行

杜頽

秋草馬蹄輕角弓持弦急去爲龍城侯正值胡兵襲
軍氣橫大荒戰酣日將入長風金鼓動白露鐵衣濕
四起愁邊聲南轅時佇立斷蓬孤自轉寒鴈飛相及
萬里雲沙漲路平冰霰澁夜聞漢使歸獨向刀環泣

塞下曲

薛奇童

驕虜初南下烟塵暗國中獨召李將軍夜開甘泉宮

一身許明主萬里總元戎霜甲臥不暖夜半聞邊風
胡天蚤飛雪芳檄多轉蓬寒雲覆水重秋氣連海空
金鞍誰家子上馬鳴角弓自是幽并客非論愛立功
出塞

唐寅

烽火照玄菟嫖姚召僕夫朱家薦逋虜刀閒出黠奴
六郡良家子三輔弛刑徒笳度烏啼曲旗參虎落圖
寶刀裝鞞琫名駒被鏤渠縱金出孤竹飛旌掩二榆
妖雲壓亾塞珥月照窮胡勒兵收日逐潛軍執骨都
姑衍山重禪燕然石再剗功成肆郊廟雄郡却分符

驄馬驅

唐寅

悠悠驄馬驅道阻歲云晚豈無同表士念子不能飯
木脫辭故枝去家日已遠鳴鷄戒前道夕暝猶驅蹇
筋力已非舊淚下不可卷

古東門行

張洪

僕夫顧我悲轅馬踟不行古來離別地青草不復生
居人攀桃李悵望難爲情流塵起阡陌遠樹花冥冥
欲向東門道唱此東門行土中有朽骨聞之復心驚

升天行

李夢陽

扶桑躍陽彩海氣騰瑤光六龍抗斗樞九帝開雲間
振衣躡仙蹤飛轡驂鸞翔仰身操天瓢手勺沆瀣漿
朝嬉太乙館夕憇玉女堂馳情覽八極縱目窮遐荒
環運無恒存逝代多隱傷回旌拂九曜捷步登文昌
進謀之益側待問紫玉房羣靈贈大藥諸御傳神方
無惜一粒分遂令民壽康

仙人好樓居

李夢陽

律律海中洲峨峨白玉樓上曾結浮雲下戴神鰲遊
前簷陰白榆青龍守門樞上有無始公餐霞煉金腴
飛瓊鼓玄橐浮丘扇其隅情閑覽八表出入服氣輿
日月跳兩珠廻旋但須臾萬年永福昌寤言莫相忘

白馬篇

李夢陽

白馬紫金羈揚鞭過市馳萬人皆辟易言是賣珠兒
生長本倡門結交蒙主恩寢食玉榻側獨聆漫渥言
取金大長秋徵歌李延年家住十重樓珠簾白玉鉤
綺繡裁襦裳妖艷無匹儔片言卽賜第意氣凌五侯

放歌行

何景明

天命諒靡易富貴安足陳自昔慕豪勝重義還輕身
整轡逾鞏洛驅車入咸秦立觀青雲上馳步要路津
射策報明主投書干大臣身爲五侯客家與七貴隣
杯酒縱經過冠蓋羅逡巡顧盼生光彩吹噓借陽春
各矜意氣好自比骨肉親時事多變異交道亦湮淪
要盟等金石棄擲同灰塵赤心不足恃白頭更如新
歸來嗜藜藿偃仰隨松筠始知葵藿甘不若蘭桂辛
願從白屋士請謝玉堂賓

獨漉篇

何景明

獨漉獨漉驅車折軸不畏折軸但畏車覆芄芄者猶
生彼中衢雖有蘭蕙當門則鉏同行竊金相顧道左
我實不知彼則畏我食荼知苦食梅知酸狐裘之敝
可以禦寒有虎斑斑伏于林下我欲射虎愧無勁弩
肅彼北風渡彼中流豈不懷憂與子同舟

游俠篇

徐禎卿

四牡飭朱軒俠氣何翩翩夕鴛那鄆道朝馳函谷關

千金飾冠劍寶服芳且鮮徒御若雲浮周道直如弦
堂中養死士被服皆珠紈馬馱梁肉貝甲委如山
片言傾五嶽萬乘慕其賢諸侯奉白璧爲壽卮酒前
合從連趙魏駕轂出齊燕仗劍歸質子矯節奪兵權
皦皦日中議軟血重一言鷄鳴脫虎口狗盜乃獲全
天地相盪蝕四海如沸淵憑軾一抵掌解紛談笑間
縱橫負竒節逸氣蓋八埏慨慷功名會何言七尺捐
策勲山河溢流光竹帛鐫何爲坎壈士撫劍獨長歎

結客少年場行

徐禎卿

驅馬宰青絲閭里爭耀馳朝遊吳姬肆暮入屠沽兒
袖中挾匕首跨下黃金鉞然諾杯酒間泰山心不移
東市殺怨吏西市仆讐尸裂眦白日變英風拉如摧
突過銅龍門電影忽如遺司隸徒歛手行人莫敢窺
橫行三輔間法令不得施壯義冠千古雄聲流四垂

巫山高

薛蕙

巫山高鬱鬱襟帶亘天涯上靡白日陽下陵青雲眉
玄巖何嵯峨層巘互參差景象非一狀遠望令心悲
獻歲出游獵千乘齊交馳翠帳羅曲阿羽蓋垂瓊芝

龍騎踐蕙圃鷁首戲蘭池回車背中路娛樂未云疲
置酒景夷臺設禮高唐祠君王千萬歲歲長如斯

閭闔篇

王廷相

天門何嵯峨雙闕瑞靈浮迥臨飛龍臺仰承翥鳳樓
咸秦天府國鞏洛帝王州表裏見山河威光列王侯
鴻勳垂百帝壯麗渺莫儔日月經其上星辰旋其周
紫皇乘雲霞羣仙拜宸旒擊鐘法駕動鳴球韶音流
翰林麗詞章虎衛森戈矛禹貢方物陳王會華夷收
大和升舜年斯民興堯謳玉檢不東封龍舸不南遊

恢恢八埏內穆穆元化修昌運良在茲賡歌欽皇猷

長歌行三首

李攀龍

嗟我谷中蘭猗猗復英英秋氣日夜至鷓鴣乃先鳴
百草不重芳霜露浩縱橫栖栖就一役慷慨非其情
少壯復何爲老大無成名

仙人攬紫芝燁燁如芙蓉兩耳委其肩短髮以蒙茸
侍從幾玉女導我入雲中奉我一丸藥期我於空同
服之生羽翼綽約變形容顧見雲中鹿蜿蜿成龍
纍纍城上星河漢流清光耿耿不能寤寤言起徬徨

續文選 卷九
三十一
傍徨立中庭遼遼夜未央白露塗我衣北風吹我裳
還坐顧四壁蘭燈一何明緘書寄遠道涕泣下縱橫
倦鳥無故林遊子無故鄉驅車出門去徒侶相扶將

短歌行

李攀龍

駟馬可縻去日難追清酒載觴短歌苦悲邀當以遊
何能坐愁全身遺名唯有莊周鳳凰于飛覽彼九圍
但爲君故駕言旋歸杜門似鄙離俗似驕傍徨所欲
此一何勞斑斑猛虎其尾可履鬱鬱壯心猝不可抵
傾側勢利還自相戕覆車不戒躊躇鴈行秋風駢駢

轉蓬如輪漂揚四野莫知所臻鳥不厭高魚不厭深
爾其肆志載浮載沉

塘上行

李攀龍

塘上雙鴛鴦芙蓉翳其陰不自行仁義何能知妾心
青蠅一墮耳琴瑟難爲音新人入宮時意已無同衾
君子在萬里顏色安可任念妾平生時豈謂有中路
新人斷流黃故人斷統素新人種蘭若故人種桂樹
新人操陽春故人操白露新人日以驪故人日以悲
浮雲顧我庭北風動我帷恩愛儻中還皓首以爲期

燕歌行

李攀龍

秋風蕭瑟吹我裳蟋蟀寥寥啼我牀出門四顧非故鄉誰能客遊不斷腸短歌微吟激繁霜浮雲千里一徬徨仰看明月流清光二十八宿羅成行高臺飛閣遙相望河漢縱橫難為梁胡馬北鳴鴈南翔憂來不知從何方慊慊伏枕聊自當涕從中零安得防豈不懷歸道阻長

善哉行

李攀龍

來日難期少合多離今日相樂不醉何為寥寥北堂哀竹苦絲短歌裂耳慨慷以悲白日云沒秉燭繼之何晝何夜迨我盛時烹肥擊鮮斗酒自隨安知王喬八公者誰促坐行觴交屬所私百年如寄當復何疑慊慊惜費智者所嗤計會有無將以奚遺

飲馬長城窟行

李攀龍

蕭蕭山上草悠悠山下道長城一何長遠望多悲傷遠望不如歸游子日依依依依復纍纍涕泣當為誰高臺知天風鴻鴈知天霜欲媚復無人欲去復徬徨

續文選 卷九
浮雲西北來我馬顧之鳴願附尺素書迢迢東南行
浮雲不可託素書不可成十年違室家安知卽平生

白頭吟

李攀龍

青如雪中栢鑿如水中石自君有兩意事事非疇昔
疇昔共綢繆何嘗不膠漆今日不膠漆明日卽參商
東西大道上車馬遙相望新人此一時故人彼一時
難將故人意持與新人知非不結同心人情中道還
白頭百年期豈作斗酒間雲漢何繩繩星宿何纍纍
意氣一以失黃金不可爲決如隕防川絕如蹶張絃

有親相推與無親私自憐

廣齊謳行

李攀龍

不勞歌楚艷請爲罷吳趨上客但安坐聽我奏齊謳
鷹揚表東土賜履維青州沃壤旣如膏絲枲鞞且柔
魚鹽無儉歲海王自春秋百二敵彊秦八九吞徒洲
美哉一匡力天下咸宗周朝服西濟河鞭箠使諸侯
至今臨淄途誦義慕前修枹鼓立軍門意氣縱橫浮
舉袂成幃幙攘臂赴仇讐先君務養士奕世恢鴻猷
晏嬰以當路結交魯孔丘其人聘列國終日無停輟

及聞韶音若與唐虞遊三月忘寢食栖栖此淹留
季札本荆蠻華夏多夷猶泱泱大風觀采不能休
五伯桓稱首四豪文其尤擁篲爲賓師鐵籠存主憂
濶達有遺俗功利非所謀馳騁一何雄冠劍常相求
蠲辭萬家邑連謝千金酬卽論二布衣豈復商賈流
結客少年場行

李攀龍

翩翩白馬客遊冶長安城自矜有俠骨骯髒多交情
羞倚將軍勢詎借傍人名利劍一在掌四海皆弟兄
片言出肝膽杯酒如平生恩讐等白日然諾千金輕

君看少年場意氣誰縱橫罵坐亦已麤探丸非老成
淺之爲丈夫賢豪大所營長兄推魯連仲兄推虞卿
小弟處囊中毘勉荆楚行但令稱國士不必取先鳴

遠遊篇

李攀龍

乘躋萬里外言造太微庭雲霞曜朱闕日月夾丹楹
羣后儼金止仙女紛玉亭隨風列以雨出窈而入冥
沆瀣飛素液芝草不復零虹霓爲我帶雜佩搖華星
濯纓河漢流清波正泠泠俯視世間人汎汎如浮萍

太山篇

續文選
卷九
李攀龍

大東有神獄專名爲岱宗日精攝海氣吳野控其峯
明堂朝列后金策紀元功維昔七十家軒轅此登封
雲霞自窈窕石室何青葱仙人攬玉樹鬚髮生清風
靈液飛潺湲芝草如蒿蓬唯帝擁靈符千載一升中
願言與問道乘龍舉太空

續文選卷第九

終

續文選卷第十

明平原湯紹祖公孟撰

樂府下

古八變歌

王世貞

秋風何慄慄惡我羅裳衣晝短不成匹中夜理鳴機
晨風俱南翔熠燿竟何之皚皚枝頭霜隱隱上蛾眉
盛年忽已過游子安用歸

同聲歌

王世貞

今夕復何夕得奉君子歡明燭在高堂三星燦以爛
盃飲不逮終襦結自成寬綢繆非一狀要約故萬端
感君纏綿意報以中心肝願爲黍與臚奉君朝夕餐
願爲縞與絺備君衣中單二候願多夕三時願多寒
金石有時泐中懷長不刊鳴鷄何咿喔北斗漸闌干
欲起復徬徨人生會面難

長歌行三首

王世貞

昭昭陽春色令我好容姿庶草各自驕誰能念先萎
秋氣發鳴蟬噉噉多伏悲逝水但知東逝日但知西

人生堅強志乃欲與時違

蜿蜿雲中龍燁燁雙飛翼扶持日月車周旋於八極
中有芙蓉冠蛾眉何脩淑眇我若舊歡貽我藥五色
顧戀塵中樂徘徊不能食曠劫不再逢怊悵安所
白露秋澄澄溥我桂樹林愁思中夜發披衣不逮衿
晨風無停號蟋蟀時再吟舉頭見明月低頭淚涔漉
明月萬里光妾人萬里心願爲隨光去萬里不能任
北斗釀酒漿南斗爲我斟言欲解我憂憂來一何深

白頭吟

王世貞

南山有匹鳥自呼為鳳凰雖復具五色不能顧其雙

一解 管者呼鳳凰鳳凰不成雙今者呼鳳凰鳳意不

求凰 二解 管求一何難今飛一何易今去呼不來管

來推不去 三解 新人芙蓉花舊人芙蓉枝新人山作

眉舊人霜作眉 四解 妾無百種態是君當心際妾無

百種嬌是君心別時 五解 牀上五絃琴一絃今一心

新絃終須斷舊絃不可尋 六解

苦寒行

王世貞

驅馬度陰山積雪何茫茫疾風四隅來馬首浩縱橫

高原無儔跡顧影僅為雙孤獸索其羣棲鳥向陽翔

寒暑客路深况乃異戎荒沈懷幽閨婦玉筋啼紅粧

旭日未及旦軋軋澁流黃年命不在已安能顧匹方

人生今失職歲暮問他鄉

獨漉篇

王世貞

獨漉獨漉水清泥濁知人惟艱聖哲斯忍蓄豹捕鼠

捷不如狸狐表施燠曷如綵絺燁燁綺羅服喪奈何

郁郁蘭蕙飢後稻禾騏驎千里水用曷神吐綬五色

曷能綵綸豈不懷賢在敵則讐雖有南威外遇莫求

續文選 卷十
國之云亾恤夫孔壬嗟彼負乘莫非行禽

悲哉行

王世貞

四坐且罷歡聽我悲哉行悲從中心發輕言涕自零
疾風吹難散春陽不能平矯矯南山松屈爲虬龍形
于霄自本性焉用美好稱寧爲折蕙蘭安爲令不芳
但睹連城碎誰睹改其光與世旣殊轍各自伸所長
悲哉復悲哉古今尚茫茫

善哉行

王世貞

今胡不樂烹鯉炙鴈篔管嘈雜衆大稱善一解天光

漸傾咸謂無歸織阿受御嗣其揚輝二解客有韓娥

僂行曼歌哀激當心涕泗滂沱三解斯爲相國卒霸

秦世晨朝百僚夕送東市四解錯衣朝衣謂調兵食

忽見前後森如霜戟五解哀樂矢催當身乃知酒不

速瀝日昃之離六解

仙人篇

王世貞

結茅華山顛上有蒼鱗車仙者四五人要我偕所如
遨遊天漢上經歷萬里餘人間所見星乃是千白榆

續文選 卷十
玫瑰切庭階木難文綺疏不知何宮殿但恠非人居
呀然珠簾起四角垂流蘇中坐太乙君夾侍青童姝
飲我丹霞漿令我易肌膚碧藕錯朱桃玉饌芬且腴
天樂不能名但用窮歡娛回首望故鄉妻孥不得俱
坐此一念謫聊復在泥塗疆疇雖歷歷他姓治田廬
欲返渺何因惻愴但含吁

白苧詞

王世貞

美人含嬌出中堂鳴環飭步齊宮商流目一眄自餘
光恍若輕雲扶太陽娛君青春志意荒白日易短夜

難長絃迫柱促樂漸終鞞鑑掩收意煩忡安能雙駐
酡顏紅

華周杞梁行

王世貞

華杞感賓車駢刀燦雙纓長驅蕩莒師千里不留行
豈爲齊君歿肯負隰侯生二發爭寫哀中夜不絕聲
皇天爲摧噫百雉拉然崩朋友自有心夫婦自有經
始知乾坤大不勝一寸誠二綽豈不雄惜哉殉淫朋
母以鴻毛重遂令泰山輕

輕薄篇

王世貞

末俗誇輕薄輕薄生有餘驕意盤眼睫貴骨滿頭顱
仲氏二千石伯兄千戶侯小弟頗妍好出入嘗奉車
大母修成君女姊班婕妤問我湯沐邑鄆杜叡上腴
問我無名錢勅賜蜀山鑪從奴衣火浣下客躡真珠
丸金彈飛鳥椎鐵擊珊瑚揮霍和氏璧蹀躞大宛駒
臂鷹出長楸鬪鷄絕九衢帶油雨擊鞠席綺寒樗蒲
調笑採桑婦闌入酒家胡腰間雌雄劍雙雙玉轆轤
一日不出匣中夜自鳴譁破壁藏翁伯罵坐輕灌夫
七貴爲低眉將相薄不圖不理關都尉可怕執金吾

道逢談天者復矜意氣殊千秋若指掌九州不足居
一言無騷雅隻字奪典謨李耳老禿翁仲尼亦豎儒
罄欬細旃表立可成唐虞飛書招越裳挾箠鞭匈奴
寧必卿曹子飲啗類屠沽相睨不相下異路請各趨
擾擾兩蜉蝣自貴亦自愚寧知青門士賢豪始同途

燕歌行

吳國倫

商飈習習清露溥羣芳銷歇秋氣寒鴻鴈連翩思故
關林月皎皎烏未安念君遠遊路漫漫萬里何時當
來還空房蟲鳴起長歎仰視明河夜闌干援琴當牕

操幽蘭哀絃激響摧肺肝同心寶燭鏤金盤朱光明
滅羅衣寬晨風一舉翔雲端我獨何爲乏羽翰

相逢行

吳國倫

相逢狹斜道車軌不得方少年盛意氣眇眇揚輝光
問君家遠近乃在新市隅走馬築金埒彈雀輕隋珠
堂上羅重筵瑤漿白玉壺中庭長琪樹照耀錦氍毹
兄弟兩三人出入承明廬伯氏騎都尉仲氏執金吾
賤子官職薄節俠傾上都休沐並來還列騎紛前驅
珪珥何煌煌觀者塞路衢入門宴賓客華燈燦綺疏

奉觴前爲壽一一邯鄲姝小姝工秦聲大姝善吳趨
丈人但安坐調瑟方踟蹰

隴西行

吳國倫

隴西走馬客出入天水關白榆間青桂夾道何漫漫
下馬投舊王舊王出未還新婦解肅容美態柔且閑
手捉桃枝扇耳辨明月環細綺爲下裙紫綺爲上衫
登堂行拜跪振佩鳴珊珊問客從何來得無久平安
請客坐上坐席布青琅玕眄笑未須臾中厨出雕盤
清酒起自酌爲壽跪客前客言主當酬微飲不及乾

續文選 卷十
左顧屬侍子何當留客歡取我牀頭瑟調絃一再彈
短歌中律呂餘芳噴幽蘭客起再拜謝何當此盤桓
罷酒送客出極樂容愈端客行猶反顧一顧三長歎
得婦有如是宋子安足攀

羽林郎

吳國倫

羽林良家子盛氣憑金吾鳴鞭出狹斜顧問酒家胡
胡姬年十五妖閑自當壚何言邯鄲倡頗擬秦羅敷
輕裙芙蓉帶單衫繡袂襦雙鬟倭墮髻珊瑚間青珠
肆中焚椒蘭席上陳笙竽千鍾與百榼上客無停酌

獨有羽林兒下馬何踟躕直入坐我傍白皙美頰腴
但坐不通名調笑復須臾殺來錯金盤酒滿鏤玉壺
微飲不及酣縱歌聊自娛遺我朱雀錦曳我連理裾
裾輕故可斷錦重非其愉上客豈無婦胡姬亦有夫
感君屬殷勤清濁難相渝金吾貴自貴毋煩私賤軀

名都篇

吳國倫

名都故佳麗少年何翩翩千金飾寶劍百金繅文鞍
臂鷹走東郊戲馬過上蘭力能嚙飛鏑巧能承弄丸
馳騁不言勞角觥相更端雙隼從何來疾風翔雲間

滿引明月弓厲鏃忽應弦一矢貫雙隼馬驟不及鞭
觀者稱神奇狐兔不敢前暮入胡姬肆挾瑟當壚彈
清酒滿玉壺珍殽羅翠盤密坐屬所私一博呼十千
旁若無世人意氣矜相憐出門夜未旦白露何漫漫

美女篇

吳國倫

美女出京洛麗質閑且都盛年處重幃足不踰門樞
晨起開新妝厭粉不施朱簪以九華玉瑱以大秦珠
屣履應鳴環微風蕩羅裾理絲織縑素經緯良獨殊
手調文梓瑟緩急諧謳趨舉體若織雲吐氣蘭不如

聞者相艷慕觀者但嗟吁媒氏亦何勞玉帛克前除
所希在良匹非敢愛弱軀良匹苦難偶歲月忽以逾
空房殊寂寥猶勝棄路衢寄謝諸少年金石難可渝

白馬篇

吳國倫

白馬紫絲韁鏤鞍白玉裝何處遊俠兒聲名播戎行
平生萬里志耻復負蓬桑長驅出右地蹀躞古戰場
腰盤昆吾刀縱橫掣電光臂掛駢角弓羽箭凌秋霜
深山刺彪虎平原射白狼巧捷無衆工叱咤人莫當
邊聲昨夜急虜騎窺朔方叱馬奮登陣軍中氣俱揚

續文選 卷十 九 和貴堂
左鼓賢王縛右發月支降往來鋒鏑間坦若馳康莊
所事在國讐那能念故鄉總無定遠封朽骨亦稱強

遠遊篇

吳國倫

一隅非我宅九土安足州迫阨從世人四顧嬰百憂
經營甕盎間區區欲何求金石良易敝曜靈忽以遭
白雲啓閭闔飄然思遠遊道逢赤松子仙藥爲我投
舉翼崑崙顛息駕扶木丘扶木挂東海元氣鼓洪流
下枝九陽伏上枝一陽浮神魚戴五城氣吐金銀樓
登樓矚列缺六漠何悠悠始知泰初理可與天地侔

飛龍篇

吳國倫

清都穆穆宮闕連蜺過謁東父道逢列仙驟駕飛龍
流覽八埏雄虬夾轂雌蜺爲鞭豐隆前導玉女踟躕
須臾萬期溟渤以田崢嶸無地寥廓無天我欲問道
與子周旋

結客少年場行

吳國倫

驄馬飾雕鞍玉珂何珊珊當場負意氣結客空長安
一語成莫逆千金盡交歡日月豈足誓睚眦各有端

續文選 卷十
相求等敵國赴急纓危冠耻就四豪食不屑萬乘千
力能脫季布軀可借燕丹劍術無衆工義聲薄區寰
新生驚蹈海公子下抱關烈烈布衣士遭逢良獨難
探丸與竊鉤盜俠居民間

同聲歌

吳國倫

結髮奉明誓區區幸見憐良無蘭蕙資微芳爲君宜
從君若形影猶恐有後先襦以合歡裁帶以結纏綿
分當侍鞶帨織素還織縑微力殫中厨蘋藻潔以鮮
帳中陳女圖載詠關雎篇將希舉案風鷄鳴亦何賢
願爲羗水龍齊鳴聲徹天願爲秦臺鳳雙舉高連翩
婉變自今夕皓首勿復遷

挽歌

挽歌

并序

王世貞

在昔文章之士多不待年崑岡一炎併命玉石何者
良以洩造化之精則真宰默仇奪人倫之標則物情
自忤繇古逮今往往齊束薤露蒿里虛分貴賤一坏
之土何所等差挽歌愴極平原達稱彭澤然不過歎
生平之不足悼大冥之無終而已彭澤龍蛻可謂實

續文選 卷一
境平原鶴唳竟成虛談至於文舉長寢希畢萬事靈
運忍痛送心正覺中散顧影夏侯怡色驅使大雅以
豁至怖雖稱澹度難謂脫離今戰鬪淳鬱棟焚如
天柱地維潰折至再而僕方蹈唯谷日虞觸藩若使
展轉河清從容牖下便當乘理而歸與化俱盡復何
悲哉是故預探所遇以待叵測聊爲三歌見聖賢莫
度之限雖變亦常耳

昭昭天宇日倏忽墮虞淵如何盛年子光彩中棄捐
白日當再晨逝者不復還素旒紛前發迫我嚮重泉
華棟自雲浮甘此七尺棺子弟來相餞餞罷各言旋

平生所著書往往畱心肝妍媸他人口已自不得言
束髮悟生趨往復雜憂患但言身日短不覩身後先
仰問巫陽師安能爲我權

丈夫事四方魂魄戀故鄉今我胡爲爾委命付窮荒
臨歿辭明去親知不在傍寸桐爲我車腐革爲我裳
魍魅爲我御瘴霧爲我糧螻蛄司門庭青蠅來吊喪
鬼伴羣侏離與語不能詳道逢司命君示我返魂方
長跪告司命生人多患傷不願復爲人但願長衍

甲兵冠天來朝野靡晏寧背親爲王臣焉以辭國殤
青霾吹蕩翳金鼓慘不揚貴賤併一時顛趾委沙場

日暮輪蹄盡烏鳶來啄創有手不能驅有目無精光
朔風吹朝夕枯骨漸堅強家人具衣冠延我之北邙
羽衛驂驪列空爲存者倡兩地竟誰真千秋浩茫茫

挽歌

吳國倫

天地有時合晝夜渾茫茫人生渺如寄勿論彭與殤
生當列屋居歿從九陰藏黃墟爲君宅白石爲君墻
狐狄爲四隣螻蛄穴中央賢愚與貴賤遺形諒相當
安見人魚膏久照驪山光

雜歌

行幸甘泉宮歌

劉孝威

漢朝迎夏畢避暑甘泉宮棧車鳴里鼓駟馬駕相風
校尉烏桓騎待制樓煩弓後旌猶五柝前笳度九嶷
才人豹尾內御酒屬車中輦迴百子閣扇動七輪風
鳴鐘休衛士披圖召後宮材官促校獵涼秋戲射熊

悲歌

高啓

征途險巖人乏馬飢富老不如貧少美遊不如惡歸
浮雲隨風零亂四野仰天悲歌淚數行下

古歌

高叔嗣

荆和當路泣良璞爲誰明
茫然大楚國白日失兼城
燕石十襲重魚目一笑輕
古來共感歎今予益吞聲

雜詩上

賦得竹

梁元帝

嶰谷管新抽淇園節復修
作龍還葛水爲馬向并州
柯亭臨絕澗桃枝夾細流
冠學芙蓉勢花堪威鳳遊
邛王若有獻張騫應拜侯

雜詩

柳惲

雲輕暮色轉草綠晨芳歸
山墟罷寒晦園澤潤朝暉
春心多感動睹物情復悲
自君之去矣蘭堂罷鳴機
徒知遊宦是不念別離非

擣衣詩

柳惲

行役滯風波遊人淹不歸
亭臯木葉下隴首秋雲飛
寒園夕鳥集思牖草蟲悲
嗟矣當春服安見禦冬衣

寶劍

吳均

我有一寶劍出自昆吾溪照人如照水切玉如切泥
鏗邊霜凜凜匣上風淒淒寄語張公子何當來見携
和蕭諮議岑離閨怨

何遜

曉河沒高棟斜月半空庭牕中度落葉簾外隔飛螢
含情下翠帳掩泣閉金屏昔期今未返春草寒復青
思君無轉易何異北辰星

詠蚤梅

何遜

兔園標物序驚時最是梅銜霜當路發映雪擬寒開
枝橫卻月觀花繞凌風臺朝灑長門泣夕駐臨邛杯
應知蚤飄落故逐上春來

和衛尉新渝侯巡城口號

王筠

閭闔暖已昏鈞陳杳將暮棲鳥城上返晚雀林中度
屯衛時巡警凝威肆安步閣道趨文昌禁兵連武庫
銅烏迎蚤風金掌承朝露采恩分曉色睥睨生秋霧
維城任寄隆空想靈均賦伊余方病免丘園保恬素
奉和春夜應令

庾肩吾

春牖對芳洲珠簾新上鉤燒香知夜漏刻燭驗更籌
天禽下北閣織女入西樓月皎疑非夜林疎似更秋
水光懸蕩壁山翠下添流詎假西園讌無勞飛蓋游
和皇太子重雲殿受戒

庾肩吾

皇明執東曜帝辰居北辰小乘開治道大覺拯蒼民
殊途同路分流合智津傳香引上德列伎進名臣
連閣翻畫圖雲更似真鏡山銜殿影梅梁落梵塵
苑桂恒天不待春萬年逢瑞應千生值法身

天衣初拂石豆火欲燃薪重善終無報輕毛庶有因

和徐王簿望月

庾肩吾

樓上徘徊月牕中愁思人照雪光偏冷臨花色轉春
星流時入翬桂長欲侵輪願以重光曲承君歌扇塵
侯司空宅詠妓

陰鏗

佳人徧綺席妙曲動鶖弦樓似陽臺上池如洛水邊
鶯啼歌扇後花落舞衫前翠柳將斜日俱照晚粧鮮
西遊咸陽中

陰鏗

上林春色滿咸陽遊俠多城斗疑連漢橋星象跨河
影裏看飛轂塵前聽遠珂還家何意晚無處不經過

山齋

徐陵

桃源驚往客鶴嶠斷來賓復有風雲處蕭條無俗人
山寒微有雪石路本無塵竹徑蒙籠巧茅齋結構新
燒香披道記懸鏡厭山神砌水何年溜簷桐幾度春
雲霞一已絕寧辨漢將秦

奉和同泰寺浮圖

庾信

岩岩凌太清照殿比東京長影臨雙闕高層出九城
拱積行雲礙幡搖度鳥驚鳳飛如始泊蓮合似初生
輪重對月滿鐸韻擬鸞聲畫水流全住圖雲色半輕
露晚盤猶滴珠朝火更明雖連博望苑還接銀沙城
天香下桂殿仙梵入伊笙庶聞八解樂方遣六塵情

幽居值春

庾信

山人久陸沈幽徑忽春臨決渠移水碓開園掃竹林
歌橋久半斷崩岸始邪侵短歌吹細笛低聲汎古琴

錢刀不相及耕種且須深長門一紙賦何處覓黃金
和趙王看伎

庾信

綠珠歌扇薄飛燕舞衫長琴曲隨流水簫聲逐鳳凰
細縷纏鍾格圓花釘鼓牀懸知曲不誤無事畏周郎
和崔侍中從駕經山寺

蕭愨

鈞陳夜警徼河漢曉參橫游騎騰文馬前驅轉翠旌
野禽喧曙色山樹動秋聲雲表金輪見巖端畫拱明
塔疑從地涌蓋似積香成泉高下溜急松古上枝平

儀台多壯思麗藻蔚緣情自嗤非照廡何以繼連城

秋思

蕭愨

清波收潦日華林鳴籟初芙蓉露下落楊柳月中疎
燕幃細綺被趙帶流黃裾相思阻音息結夢感離居
賦昆明池一物得織女石

虞茂

隔河圖列宿清漢象昭回支機就鯨石拂鏡取池灰
船疑海槎渡珠似客星來所恨雙蛾歛逢秋遂不開
秋夜獨坐

袁朗

危絃斷客心虛彈落驚禽新秋百慮淨獨夜九愁深
枯蓬惟逐吹墜葉不歸林如何悲此曲坐作白頭吟
愛妾換馬

僧法宣

朱鬣飾金鑣紅粧束素腰似雲來蹊蹠如雪去飄飆
桃花含淺汗柳葉帶餘嬌騁先將獨立雙絕不俱標
書屏風詩

大義公主

盛衰等朝暮世道若浮萍榮華實難守池臺終自平

富貴今何在空事寫丹青杯酒恒無樂茲歌詎有聲
余本皇家子飄流入虜庭一朝睹成敗懷抱忽縱橫
古來共如此非我獨申名唯有明君曲偏傷遠嫁情
感遇

張九齡

孤鴻海上來池潢不敢顧側見雙翠鳥巢在三珠樹
矯矯珍木巔得無金丸懼美服患人指高明逼神惡
今我游冥冥弋者何所慕

懷蘇武

李白

蘇武在匈奴十年持漢節白鴈上林飛空傳一書札
牧羊邊地苦落日歸心絕渴飲月窟冰飢餐天上雪
東還沙塞遠北愴河梁別泣把李陵衣相看淚成血
雨

杜甫

峽雲行清曉煙霧相徘徊風吹滄江去雨灑石壁來
淒淒生餘寒殷殷兼出雷白谷變氣候朱炎安在哉
高鳥濕不下居人門未開楚宮久已滅幽珮爲誰哀
侍臣書王夢賦有冠古才冥冥翠龍駕多自巫山臺

夢李白二首

杜甫

歿別已吞聲生別常惻惻江南瘴癘地逐客無消息
故人入我夢明我長相憶恐非平生魂路遠不可測
魂來楓林青魂返關塞黑君今在羅網何以有羽翼
落月在屋梁猶疑照顏色水深波浪濶無使蛟龍

得

浮雲終日行游子久不至三夜頻夢君情親見君意
告歸常局促苦道來不易江湖多風波舟楫恐失墜
出門搔白首苦負平生志冠蓋滿京華斯人獨憔悴
孰云網恢恢將老身反累千秋萬歲名寂寞身後事
晦日尋崔戢李封

杜甫

朝光入甕牖尸寢驚啟表起行視天宇春風漸和柔
興來不暇懶今晨梳我頭出門無所待徒步覺自由
杖藜復恣意免直公與侯晚定崔李交會心真罕儔
每過得酒傾二宅可淹留喜結仁里歡况因令節求
李生園欲荒舊竹頗修修引客看掃除隨時成獻酬
崔侯初筵色已畏空樽愁未知天下士至性有此不
草芽既青出蜂聲亦暖遊思見農器陳何當甲兵休
上古葛天氏不貽黃屋憂至今阮籍等熟醉爲身謀
威鳳高其翔長鯨吞九州地軸爲之翻百川皆亂流

當歌欲一放淚下恐莫收濁醪有妙理庶用慰沉浮

西施詠

王維

艷色天下重西施寧久微朝爲越溪女莫作吳王姬
賤日豈殊衆貴來方悟稀邀人傅脂粉不自着羅衣
君寵益嬌態君憐無是非當時浣紗伴莫得同車歸
持謝隣家子效顰安可希

崔灑陽兄季重前山興

王維

秋色有佳興况君池上閑悠悠西林下自識門前山

千里橫黛色數峰出雲間嵯峨對秦國合沓藏荆關
殘雨斜日照夕嵐飛鳥還故人今尚爾嘆息此顏顏

江上聞笛

王昌齡

橫笛怨江月扁舟何處尋聲長楚山外曲繞胡關深
相去萬餘里遙傳此夜心寥寥浦澈寒響盡唯空林
不知誰家子復奏邯鄲音水客皆擁棹空霜遂盈襟
羸馬望北走遷人悲越吟何當邊草白旌節隴城陰

田家雜興八首

儲光羲

春至鶻鷓鳴薄言向田野不能自力作昆勉娶隣女
既念生子孫方思廣田園閑時相顧笑喜悅好禾黍
夜夜登嘯臺南望洞庭渚百草被霜露秋山響砧杵
却羨故年時中情無所取

衆人耻貧賤相與尚高腴我情既浩蕩所樂在畋漁
山澤時晦冥歸家暫閑居滿園種葵藿繞屋樹桑榆
禽雀知我閑翔集依我廬所願在優游州縣莫相呼
日與南山老兀然傾一壺

逍遙阡陌上遠近無相識落日照秋山千岩同一色
網罟繞深莽鷹鷂輕翼翼獵馬既如風奔獸莫敢息

續文選 卷一
駐旗滄海上犒士吳宮側楚國有夫人性情本貞直
鮮禽徒自致終歲竟不食

田家趨墮畝當晝掩虛關隣里無煙火兒童共幽閑
桔槔懸空圃鷄犬滿桑間時來農事隙採藥遊名山
但言所採多不念路險艱人生如蜉蝣一往不可攀
君看西王母千載笑容顏

貧士養性情不復知憂樂去家行賣畚留滯南陽郭
秋至黍苗黃無人可刈穫孺子朝未飯把竿逐鳥雀
忽見梁將軍乘車出宛洛意氣軼道路光輝滿墟落
安知負薪者啞啞笑輕薄

楚山有高士梁國有遺老築室既相隣同田復同道
糗糒常共飯兒孫每更抱忘此耕耨勞愧彼風雨好
蟪蛄鳴空澤鷓鴣傷秋草日夕寒風來衣裳苦不早

梧桐陰我門薜荔網我屋超超兩夫婦朝出暮還宿
稼穡既自種牛羊還自牧日旰懶耕鋤登高望川陸
空山足禽獸墟落多喬木白馬誰家兒聯翩相逐馳

種桑百餘樹種黍三十畝衣食既有餘時時會賓友
夏來菰米飯秋至菊花酒孺人喜逢迎樺子解趨走
日暮後園裏團團蔭榆柳酪酊乘夜歸涼風吹戶牖
清淺望河漢低昂看北斗數甕猶未開明朝能飲不

裴尹東溪別業

李頎

公才廊廟器官亞河南守別墅臨都門驚湍激前後
舊交與羣從十日一携手幅巾望寒山長笑對高柳
清歡信可尚散吏亦何有岸雪青城陰水光遠林首
閑觀野人筏或飲川上酒幽雪淡徘徊白鷺飛左右
庭竹垂卧內村烟隔南阜始知物外情簪紱同芻狗
宿王昌齡隱居

常建

清溪深不測隱處惟孤雲松際露微月清光猶爲君

茅亭宿花影藥院滋苔紋余亦謝時去西山鸞鶴群

江上琴興

常建

江上調玉琴一絃清一心泠泠七絃遍萬木徵幽陰
能使江月白又令江水深始知枯桐枝可以徵黃金

秋夜聽羅山人彈三峽流泉

岑參

皤皤岷山老抱琴鬢蒼然衫袖拂玉徽爲彈三峽泉
此曲彈未半高堂如空山石林何颼颼忽在牕戶間
繞指弄嗚咽青絲激潺湲演漾怨楚雲虛徐韻秋烟

續文選 卷十
疑兼陽臺雨似雜巫山猿幽引鬼神聽淨令耳目便
疑客腸欲斷湘妃淚斑斑誰栽青桐枝緹以朱絲絃
能合古人曲迺與今人傳知音難再逢惜君方老年
曲終月已落惆悵東齋眠

幽居

韋應物

貴賤雖異等出門皆有營獨無外物牽遂此幽居情
微雨夜來過不知春草生青山忽已曙鳥鵲繞舍鳴
時與道人偶或隨樵者行自當安蹇劣誰謂薄世榮

田家三首

柳宗元

蓐食狗所務驅牛向東阡鷄鳴村巷白夜色歸暮田
札札耒耜聲飛飛來鳥鳶竭茲筋力事特用窮歲年
盡輪助徭役聊就空自眠子孫日已長世世還復然
古道饒蒺藜縈廻古城曲蓼花被堤岸陂水寒更綠
是時收穫竟落日多樵牧風高榆柳疎霜重梨棗熟
行人迷去住野鳥驚棲宿田翁笑相念昏黑慎原陸
今年幸少豐無厭饘與粥

籬落隔烟火農談四隣夕庭際秋蟲鳴踈麻方寂歷
蠶絲盡輪稅機杼空倚壁里胥夜經過鷄黍事筵席

各言官長峻文字多督責東鄉後租期車轂陷泥澤
公門少推恕鞭朴恣狼籍努力慎經營肌膚真可惜
迎新在此歲唯恐踵前跡

觀舞

劉禹錫

山鷄臨清鏡石燕赴遙津何如上客會長袖入華裯
體輕若無骨觀者皆聳神曲盡回身去層波猶注人
和薦福寺英公新構禪堂

丁仙芝

上人久棄世中道自忘筌寂照出羣有了心清衆緣

所以于此地築館開青蓮果樂羅砌下朝虹垂戶前
呪中灑甘露指處流香泉神遠日無事體清宵不眠
枳聞廬山法松入漢陽禪一枕四山外虛舟常浩然
旅興

劉基

日落天氣涼逍遙步庭堦蟋蟀已在宇鴻鴈來何遲
少壯輕遠遊衰老傷別離念我親與友各在天一涯
音容兩契濶悲歡絕相知鍛羽懷舊林葺鱗思故池
百年能幾何逝者無還期俛仰增感嘆有懷當語誰
殷勤託宵夢聊用慰所思

琴清堂

劉基

亭亭嶧陽桐斲爲綠綺琴絙之朱絲絃彈成白雪音
虛堂夜迢迢華月耿疎林鳳凰天上來虬龍水中吟
曲罷起太息無人知此心

書北山精舍壁

袁凱

夙昔慕幽曠中年值奔走及茲始知返顧已成皓首
茲爲山水選風氣固深厚清泉寫幽磴白雪被層阜
旣多緇素流况有耕釣叟初心已云協雅言得兼受

始來疎梅墮復此山櫻剖庶幾去日遲誰謂行當久
揮手謝朋侶吾將寄衰朽

三忠祠

李夢陽

憶昔漢孔明龍起答三顧志決竟星隕嘔血爲軍務
鄂國與信國屹屹兩砥柱殺身不救國冤憤水東注
往事勒鐘鼎新廟傍官路慘慘冠劍金凜凜生魂聚
翠旗晚明滅往往鬼神駐懷嘆各不申翻然向煙霧
我征久奔迫過此感傷屢時來肅展謁繫馬門前樹
香臺野蕨上羅幔蟲蟻蛀烈士爲吞聲清風激頑懦

湘妃怨

李夢陽

采蘭湘北止，舉木澧南潄。淥水含瑤彩，微風託玉音。
雲起蒼梧夕，日落洞庭陰。不知篁竹苦，惟見淚斑深。

擣衣

何景明

涼飈吹閨闈，夕露淒錦衾。言念無衣客，歲暮芳寒侵。
皓腕約長袖，雅步飾鳴金。寒機裂霜素，繁杵叩清砧。
哀音緣雲發，斷響隨風沉。顧影惜流月，仰眄悲橫參。
路長魂屢徂，夜久力不任。君子萬里身，賤妾萬里心。

燈前擇妙匹，運思一何深。裁以金剪刀，縫以素絲鍼。
願爲合歡帶，得傍君衣襟。

觀春雪

何景明

騰空布柔雲，蕩日溢繁吹。素雪千里來，飄揚九衢內。
積陰改玄節，新陽獻青歲。永辭寒卉寂，甘金春華媚。
繽紛散廣陌，晶耀敞塵界。旣隨游霰集，復與流飈會。
臨牖翫靡足，陟檻望逾邁。參差百薨接，崑崙層臺對。
佳人御櫺軒，上客倚飛蓋。旖旎結華纓，離緹飄素帶。
郢中有希唱，陽阿豈恒態。君胡慕高臥，沉冥獨無類。

江夏題王太守城南精舍

徐禎卿

林步不覺遠溪流隨興長悠然深竹裏獨往綠蘿莊
山色佳南郭平疇連北堂野人來荷鋤蠶月百草芳
寤愜白雲賞載謠叢桂章垂楊足池鯉閑牖有壺觴
念此牽情性何勞緇素裳

雜感

孫一元

抱易住南山日與湖水對煙霞散不收晨昏變奇態
亦知避世心翛然自我輩乾坤古神器機運相謝代

道術獵羣動兀兀意獨在

秋日雜詩二首

楊慎

秋霖溢城闕后土何時乾周行無軌轍出入阻且艱
長安有一士葦門晝長關開徑理蓬蒿荒我蕙與蘭
蕙蘭日將歇蓬蒿不可刪仰首向浮雲慨然增永嘆

羲和運天晷候蟲和歲陰昔爲莎鷄羽今爲蟋蟀吟
感彼蕭條節動此棲遲心旅人在異鄉相思夢同衾
登臨一以眺但見丘與岑清泠含廣澤悲商印遙林
結軫還歸來當軒撫鳴琴幽蘭久不奏誰哉知此音

雜詩二首

薛蕙

植草會成蔓種木當爲株休咎豈虛生景響不相踰
呂生釣竒貨蘇子挾陰符六國假相印萬戶割名都
一朝計不售倉卒蒙罪辜狙詐適自困傾巧定焉如
生時諒非榮旣沒辱有餘達人安貧賤貴欲弭禍
玉以采自斲丹以澤自銷高才耀當時荼毒竟相招
傅子感飛蛾張公喻鷓鴣思患豈不微履險果焉逃
嗟哉世路間覆轍常所遭千金憚垂堂胥靡易登高
願隨方外士杖策歸蓬蒿

再調考功作

高叔嗣

引疾三上書微願不克諧徙官復在茲心迹一何乖
軒裳日待旦閭闔凌雲排入屬金馬籍出與羣龍偕
積賤詎有基履榮誠無階但惜平生節逾久浸沉埋
旣妨來者途誰明去矣懷鳥迷思故林水落存舊涯
唯當尋素業歸臥守荆柴

二郎回谿詞

皇甫汈

謝公永嘉守在郡宥無爲敦賞殖令弟華萼每相携

續文選 卷下
三十一 補真堂
躋險旣山頓窮源亦水嬉溪名沐鶴是人睹游龍非
駕言輟棹際金影浣紗時凌波餐秀色拾翠逗芳儀
援琴挑未就解佩贈猶疑高唐後宋玉洛浦悵陳思
杼章但唇動締心空目馳來同湫風止去作飄雲辭
停聲三婦艷嗣響二郎回

春日訪于鱗 天壇道署

皇甫濂

曉出城南郭芳坳展新曠柔荑秀綠野和烟蕩華旭
穹壇結翠氛玄宮麗瑤玉雲門藹以深芝臺歷紆曲
彼美丘壑姿寢瘵寄遐躅淪躋警宿心恬曠澹方足

旣擬長卿慢兼抱邛生欲道勝物自遺神閑象不束
緬此逸世途愧無區中祿至理非空空亮懷在微勗
且申離索情茲往誰爲告

續文選

卷十



